

Heberu

Heberu vaġa-foforina guruġari

Mai fefa toretorena tarimana ta tu asi ribana. Tari ġekirani tu Luka na etoreato, tari ġekirani tu Apolos, o Banabas, o Priskila, o Akwila, o Paulo na etoreato ġetoni. Ġutuma ġekirani tu Paulo ġetoni korana fefa tu Paulo ġena fefa tore maġurinai ġetoreato. Mai fefa tu laġani 60 ema 70 fakari nuġanai ta ġetoreato, mo tu Iesu emaseto murinai.

Mai fefai siri baregori tu karoa 1:3; 4:14-16.

Mai fefa etoreato tarimana ġena ura baregona tu, 1) Heberu ekalesiari bene kirari, ekalesia maġurina korikorinai beġene tanu, a Iuda ġeri sene taravaturi ema maġuriri ġerina tu beġene raka-veġita ma ġeri ai asi ma beġene ġenoġoi-iaġo, maġuri vanaġivanaġi asi beġe doġariani garina (2:1; 6:4-6; 10:26); 2) Iesu Keriso bene vaġa-foforia, ġia tu moġoni Barau vetoġana korikori ema foforito tanobarai; 3) Barau ġena Ginitaġo Variġuna Iesu ġenai emoġonito moġa bene vaġa-fofori ginikaua etato.

Mai fefa tu maiġesina eboioġaiato:

1. Vevaġa-riba-iaġi guruġari - karoa 1:1–10:18

2. Ekalesia tanutanuna maġuriri - karoa 10:19–13:25

Barau ġena guruġa Natuna ġenana

1 ¹Guinenai, ġaro vovoka e dabara ġutumai Barau na peroveta tarimari ġerina senera evaġa-guruġarito. ²Senaġi toma, mai ġaro dokori ai, tu Natuna ġenana ema vaġa-guruġarato. Barau na dagara mabarari tu Natuna eviniato bene ġaunari. Ema ġia ġenana maki Barau na guba e tanobara eveirito. ³Ġia tu Barau marevana e mamana baregona evaġa-foforiani, ema ġia tu Barau tauġena kavana. Ġia ġena guruġa seġukana na dagara mabarari eġabi-taġorini. Ġia tauġena na ġera rakava ġuriġivaġiri dabarana evei-ġitakauato murinai, Barau Iaru-korokoro aroribanai ea tanu-tarito gubai.

Barau Natuna tu barego vedaurea, aneru maki evanaġirito

⁴Barau na Natuna tu etore-varaġeato, aneru evanaġirito. Korana tu arana eviniato maki varaġe lelevaġina, aneru arari evanaġirito. ⁵Korana Barau na aneru ta tu asi ekiraiato, ekirato,

- “Ġoi tu au Natugu,
toma au tu ġoi Tamamu ai baiaġo.”
O maiġesi maki asi ma ekiraiato, ekirato,
“Au tu ġia Tamanai baiaġoni,
ema ġia maki au Natugu ai beiaġoni.”
6Ema Barau na Natuna guinena tanobara ġana ma beġori-iaġomaiani nai
tu bekirani,
“Barau ġena aneru mabarami na boġono toma-rakariġo vinia.”
7Aneru ekiraġirito nai tu ekirato,
“Barau na ġena aneru eveirito iavara kavana,
ġena vetuġunaġi tarimari karava emoreni noġa.”
8Senaġina Natuna ekiraġiani tu ekirani,
“Barau o, ġoi ġemu Vere dagina tu betanu-vanaġi vanaġini,
ġemu Basileia tu ma iobukaiobukamu ġesi oġori-kauani.
9Vei-iobukaiobuka tu oura-vinirini,
ma veġa rakavari tu asi oura-vinirini.
Moġa lorinai, Barau o,
ġemu Barau na maki karomu fakari ai ġoi eġabi-viriġimuto,
debamu ai diġa esisiato,
iaku na evaġa-vonumuto.”
10Ema ma ekiraiato, ekirato,
“Vere o, tovotovonai tu
ġoi na tanobara oveiato,
ema guba maki ġoi ġimamu veiveina.
11Ġia tu beġe korini,
senaġi ġoi tu botanuni;
mabarari dabuġa kavana beġe rakavani.
12Ġoi na koudi noġa boiokurini,
dabuġa kavana vetoġari beġe irauni,
senaġi ġoi vetoġamu tu asi beirauni,
ema ġoi ġemu maġuri laġaniri maki
asi beġe magoni.”
13Barau na aneru ta maki asi ekiraiato,
“Aroribagu ai noma tanu,
bene iaġo mo, ġoi ġevetari-vinimuni tarimari ġoi kwakumu
fanakauna dagananai batore-taririni.”
14Aneru mabarari tu vetuġunaġi iaukari moġo, Barau na etuġurito
deikara vevaġa-maġuri beġe ġabiani tarimari vaġa-kavari ġana.

Vevaġa-maġuri baregona

2 1Moġa lorinai kara taseġaġirito guruġari tu tana ġabi-gigitariri, asi
namo ġerana beġe rekwarkwani, benamo taaiaġo-viniani gabuna

bita leaiani. ²Korana aneru na ġita senera ġeri ġevari-fiurito guruġari tu moġoni veġata, ma mo guruġa moġeri ġekira-sirivaġi-iaġirito e asi ġekorana-iaġirito tarimari tu ġeri vei-rakava ilailari ai metona ġeġabiato, ³a ġita tu kamasi bita raga-maġurini, bema mai vevaġa-maġuri baregona bita ġita-ġuiraġiani nai tu? Mai vevaġa-maġuri tu tovtovonai Vereġauka tauġena na evari-fiuato. Moġa murinai tu ġeseġaġiatio tarimari na ġai ġema-kiravaramato mo tu moġoni. ⁴Barau na maki evaġa-moġoniatio vetoġa boruri ai, e nuġa-farevaġi veġari ai, e seġuka veġari boruri dabara irauirauri ai, ema Iauka Veaġa ġena varevare dagarari na. Mo Iauka Veaġa ġena varevare dagarari tu Barau ġena ura lorinai veġabidadama tarimari evinirito.

Iesu na vevaġa-maġuri gabuna ġana eġori-iaġorani

⁵Mo tanobara beiaġomani ġai na ġakiraġiani tu Barau na dia aneru ġeri veġitaġau gaburenai etoreato. ⁶Senaġina Buka Veaġa nuġanai gabu tai tarima ta evarifiuto, ekirato,

“Barau o, tarimarima tu dei,
be ġoi na otuġamaġi-gwaġiġiani?
O Tarimarima Natuna tu dei,
be ġoi na oraka-ġitaiani?”

⁷Ġoi na kota otore-variġoato aneru gabureri ġana;
murinai mareva baregona e vegubakau koronana ġenai otore-kauato,
⁸ema dagara mabarari ġia kwakuna gaburenai otorerito.”

Korana Barau na dagara mabarari tu ġia ġena veġitaġau gaburenai etorerito. Moġoni, Barau na dagara ta tu asi etore-ragakwaneato, ġia ġena veġitaġau gabuna murikanai. Senaġina maitoma dagara mabarari tu dia ġia ġena veġitaġau gaburenai taġitarini. ⁹Senaġi Iesu taġitaiani, ġia tu Barau na mo faka kotunai etore-variġoato aneru gabureri ġana, korana Barau ġena varevare-bara ġenana tarimarima mabarari urari ai bene mase. Toma Iesu tu taġitaiani, iatanai Barau na mareva e vegubakau baregona etore-kauato, korana tu midigumidigu ai emaseto.

¹⁰Dagara mabarari eveirito e eġaunarito Barauna, ġena ura tu Iesu roġo midigumidigu ġenana asi vetoukaunai bene iaġo-guine. Moġa murinai vauro natuna ġutumari ma bene ġori-iaġomari, benamo ġia marevana e mamana baregona beġene ġabia. Barau ġenai dabara roroġotona sebona tu moġa moġo. Korana Iesu tu Barau natuna ġeri vevaġa-maġuri tarimana baregona. ¹¹Tarimarima evaġa-veaġarini tauna, Iesu, ema Iesu na evaġa-veaġarito tarimari Tamari tu sebona. Moġa lorinai Iesu tu asi emaiakaiani mo evaġa-veaġarito tarimari ekiraġirini ġia tarikakana. ¹²Ġia na Barau ekiraiani, ekirani,

“Ġoi aramu tu au tarikakagu ġeri ai bakiraġi-foforiani;
ekalesia nuġanai ġoi mari ai bavonevone-raġemuni.”

13 Ma ekirato,

“Barau ġenai baveġabidadamani.”

Emma ma ekirato maki,

“Au tu maiġegu Barau na eviniguto doġorona natuna ġesi.”

14 Korana Barau natuna mabarari tu ma viriġori e ma rarari nai, ġia tauġena maki ġia ilailari ai eiaġoto. Moġesi eveito korana tu, ġena mase ġenana mase seġukana eġabi-taġoani tarimana, Diabolo, bene vaġa-rakavaia ġana. 15 Ema tarimarima deikara ġeri maġuri nuġanai mase garina na eġuġuvirito bene vaġa-maġuriri ġana. 16 Moġoni, Iesu na tu dia aneru evaġa-kavarito, senaġi Aberahamo besena. 17 Moġa lorinai Barau na Iesu tu dabara mabarari ai tarina doġoro ilailari ai eveirito. Korana mo dabarai vau vevetuġaġwa e vetuġamaġikau Rubu Veaġa verena baregonai beiaġoni. Ema Barau vetuġunaġina beiaġo-vinini, tarimarima ġeri rakava na bene voi-vaġiri ġana. 18 Korana Iesu tauġena na veribaġani midigumidiguna mamina eġabiato, toma kamara deikara veribaġani beġoitaġoni nai tu bevaġa-kavaiani riba.

Iesu ġena seġuka na Mose ġena seġuka evanaġiato

3 1 Moġa lorinai, tarikakagu veaġami, ġomi tu Barau na ekeamito guba na. Ġemi tuġamaġi boġono tore-gwaġiġia Iesu ġenai. Ġia tu Barau na etuġuato Rubu Veaġa verena barana. Gita na tu ġia takiraġi-foforiani. 2 Iesu tu Barau na evaġa-ruġaiato Rubu Veaġa verena. Ema ġia tu ma ġena vetuġamaġikau Barau ġenai, ilailana Mose ma ġena vetuġamaġikau Barau ġena numai kavana. 3 Numa eragaiani tarimana tu ġegubakau-baregoani, a eveiani numana tu ġegubakau-keiani. Moġesi kavana Barau na Iesu tu mareva baregona eviniato, Mose na eġabiato marevana evanaġiato. 4 Numa mabarari tu ma ragaragari tarimari, senaġina dagara mabarari veiveiri tu Barau ġereġana. 5 Mose tu vetuġunaġi-iaġovini tarimana, ġia ma ġena vetuġamaġikau Barau ġena numai. Ema ġena ġauvei tu ġoirai Barau na kara bekiraġirini guruġari ekiraġi-foforirito-ġoi. 6 Senaġina Keriso, Barau Natuna, tu Barau ġena numa eġita-ġauani. Gita tu ġia ġena numa, bema ma kokorera e ma iakura ġesi taveiavi-iaġiani tuġamaġikaunai bita veġabi-gwaġiġini beiaġoni mo magona.

Barau ġena tarimarima ġeri iaġaraġi

7 Moġa lorinai Iauka Veaġa ekirani kavana bitana vei, maiġesi ekirani,
“Toma bema Barau garona boġo seġaġiani nai tu,

8 nuġami asi boġono vaġa-gwaġiġi foroforori,
senemi tanobara fakanai veribaġani ġaronai ġeseġaforeto kavana.

9 Oba, tamam i na laġani gabana vasivasi (40) tanobara fakanai ġegu
ġauvei ġeġitaiato,

senāgina ġeribaġaniguto e ġevaġa-uraguto.

¹⁰ Moġa lorinai mo bese abaru-vinirito,

benamo akirato, ‘Ġia nuġari tu vanaġivanaġi au ġeguna ġeveġitani, ema au ġegu veiġa maki asi ġeribarini.’

¹¹ Moġa lorinai ma baruġu ġesi aguruġa-foforito,

‘Ġia au ġegu iaġaraġi ai tu asi beġe raka-toġani.’”

¹² Tarikakagu mabarami, boġono venari. Asi namo tarikaka ta ġomi fakami ai loruna ġutunai vei-rakava betanuni, ema Barau ġena guruġa asi bevaġa-moġoniani, benamo maġuri Barauna ġenana beraka-veġitani.

¹³ Toma mai ġaro maiġa Barau ekirani, “Tomaġaro” etoni ġiranai, karomi tata ġesi boġono velaunaġi, be vei-rakava ġena ġofaġofa na ta nuġamu asi bene vaġa-gwaġiġia. ¹⁴ Ġita tu Keriso ġesi tasebonato, bema tovotovonai taġabi-raġeato veġabidadamana moġa bita ġabitari-gwaġiġiani beiaġoni mo magona. ¹⁵ Buka Veaġa ekirani kavana,

“Tomaġaro ai bema garona

boġo seġaġiani nai,

nuġami asi boġono vaġa-gwaġiġiri,

guinenai ġomi senemi seġafore ai ġeveito kavana.”

¹⁶ Dei na tu Barau garona ġeseġaġiato, senaġi ġena guruġa ġekira-fitoġarito, benamo ġevaġa-baruato? Mo tu Mose na Aigupito na eġori-rosirito tarimari mabarari, ene?

¹⁷ Ema deikarari tu Barau na mo laġani gabana vasivasi (40) nuġanai ebaru-vinirito? Tarimari tu moġeri, rakava ġeveito, benamo tano fakanai ġeketoto, benamo ġemaseto, ene?

¹⁸ Ema Barau na tu deikarari ekirarito, ekirato, “Au ġegu iaġaraġi gabunai tu asi beġe raka-toġani.” Ġeseġaforeto tarimari ekirarito, ene?

¹⁹ Moġa lorinai ġita taribani, ġia tu asi ġeraka-toġato, korana Barau asi ġevaġa-moġoniato-ġoi nai.

4 ¹ Barau ġena iaġaraġi ai bita raka-toġani guruġatorena tu roġo eruġa-taġoni. Moġa lorinai bitana venari, ġita fakarai ta mo iaġaraġi ai asi beraka-toġani garina. ² Korana mo Vari Namona ġita ġera ġeġobata-iaġiato tu Isaraela tarimari ġeri maki ġeġobata-iaġiato. Senaġi mo guruġa ġeseġaġirito ġerina namo ta asi ġeġoitaġoato, korana tu ġeseġaġirito moġo, ma asi ġevaġa-moġonirito.

³ Senaġi ġita Barau tavaġa-moġoniani tarimara tu, mo iaġaraġi ai bita raka-toġani ġena guruġa ilailanai, ekirato,

“Au ġegu baru ai kiraġitore guruġana gwaġiġina akiraġi-foforiato, akirato,

‘Au ġegu iaġaraġi ai tu

asi beġe raka-toġani.’”

Moġoni, Barau tu moġesi ekirato, senaġina ġia na tanobara eveiato nai, ġena ġauvei mabarari tu varau evaġa-koririto. ⁴ Gabu tai Buka Veaġa nuġanai ġaro vaġa-imaima ruaruana (7) ekiraġiato nai tu, maiġesina

ekirani, “Ġaro vaġa-imaime ruaruanai (7) Barau tu ġena ġauvei mabarari ġerina eiaġaraġito.” ⁵ Ema mai vau bita kiraġia gabunai maki ekirato, “Ġia au ġegu iaġaraġi ai tu asi beġe raka-toġani.”

⁶ Senaġina tari mo iaġaraġi ai beġe raka-toġani guruġatorena tu roġo eruġani gabunai. Ma Isaraela tarimari, Vari Namona ġeseġaġi-guineato tarimari, tu mo iaġaraġi ai asi ġeraka-toġato, korana tu ġeseġaforeto nai. ⁷ Moġa lorinai Barau na ġaro ta ma eġabi-viriġiato, “Tomaġaro” ekiraġiato. Ma laġani vovoka ġekorito murinai, Barau, Davida ġenana maiġesi eguruġato, ekirato,

“Toma, bema Barau garona
boġo seġaġiani nai,
nuġami asi boġono vaġa-gwaġiġiri.”

⁸ Bema Iosua na iaġaraġi bere viniri, Barau na moġa murinai iaġaraġi ġarona ta tu asi ma bere kiraġia. ⁹ Moġa lorinai Barau ġena tarimarima ġeri iaġaraġi tu roġo ġoirai eruġa-taġoni. ¹⁰ Korana Barau ġena iaġaraġi ai eraka-toġani tarimana tu ġena ġauvei na eiaġaraġini, ilailana Barau ġena ġauvei na eiaġaraġito kavana. ¹¹ Moġa lorinai sikokore, Barau ġena iaġaraġi ai tana raka-toġa uranai. Ma ġita fakarai ta asi bene keto, guinenai ġeseġaforeto tarimari kavari.

¹² Barau ġena guruġa tu maġuri e ma seġukana. Matana maki raga-rakava, vetari baġana ta matana ruarua maki evanaġiato, erakatoġa-korikorini maġuri ma iauka vekaravarina, ema turiġa komukumuri ruarua ġeraga-sebonato vekaravarina. Tarima loruna ġutuna ġena ura e tuġamaġi maki eriba-viriġiani. ¹³ Barau na eveirito dagarari mabarari tu ta asi vekuretoġa ġia matanai. Ema ġia ġoiranai ġita mabarara ġera maġuri bita vari-fiurini.

Iesu Rubu Veaġa verena barego vedaureana

¹⁴ Barau Natuna Iesu tu ġita ġera Rubu Veaġa verena barego vedaureana; ġia tu guba eraka-vanaġirito. Moġa lorinai ġera veġabidadamai tana veġabi-gwaġiġi. Mo tu ġita na takiraġi-foforiani veġabidadamana. ¹⁵ Ġita ġera Rubu Veaġa verena baregona tu ġita ġera moiramoira ġia na maki emami-raġirini. Korana tu ġia maki ġenai veribaġani iraurau mabarari ġefoforito ġita ġerai kavana. Senaġi ġia tu asi evei-rakavato. ¹⁶ Moġa lorinai ma kokorera ġesi Barau ġena namo e varevare-bara terona ġana siraka-kavi-iaġo. Monai Barau ġena vevetuġaġwa bitana ġabia, ema ġena varevare-bara tana ġoitaġoa, be bita ura-viniani nai, bene vaġa-kavara.

5 ¹ Rubu Veaġa vereri baregori mabarari tu tarimarima fakari na Barau na eġabi-viriġirito, benamo evaġa-ruġarito, tarimarima arari ai Barau ġena ġauvei beġene veia ġana. Ġia ġeri ġauvei tu tarimarima ġeri rakava voi-vaġiri ġana varevare dagarari Barau beġene vinia ema

boromakau, mamoe, e manu beḡene vaḡiri, benamo beḡene gaburi, Barau na bonari bene noḡori ḡana. ²Rubu Veāḡa verena baregona tauḡena maki ma ḡena moira gaburi, naima ḡia na asi ribari tarimari ema Barau ḡena dabara na ḡeraka-veḡitani tarimari bevetuḡa-ḡwarini riba. ³Ḡia tauḡena maki ma ḡena moira lorinai, ḡia na rakava voi-vaḡiri varevareri tu ḡia ḡena evinini, ema tarimarima ḡeri maki evinini.

⁴Rubu Veāḡa verena baregona dagina eḡabini tarimana tu arana barego. Tarima ta na mai ginitaḡo ḡauveina tauḡena na asi beḡabi-kavaiani, senaḡi ḡia tu Barau na bene keaia vau, vaḡa-ilailana Arona ekeaiato kavana.

⁵Keriso maki moḡesi, dia tauḡena eveḡabi-varaḡeto Rubu Veāḡa verena baregonai evetoreto, senaḡina Barau na evaḡa-ruḡaiato, ekiraiato, ekirato, “Ḡoi tu au Natugu, toma au tu ḡoi Tamamu ai baiaḡo.”

⁶Gabu tai maki ekirani, “Ḡoi tu Rubu Veāḡa verenai botanu-vanaḡi vanaḡini Melkisedek kavana.”

⁷Iesu tanobarai etanuto-ḡoi ḡarori ai tu ma taḡi-koḡokoḡona ema matana ma nanuri ḡesi Barau ḡenai eḡuriḡurito-ḡoi, ema enoḡi-raḡeto-ḡoi. Korana tu Barau na ḡereḡana na moḡo mase ḡenana bevaḡa-maḡuriani. Barau na eseḡaḡiato, korana tu ma vegubakauna ḡesi Barau garina eveito-ḡoi nai. ⁸Ḡia tu Barau Natuna, senaḡi ḡena midigumidigu na vau seḡaḡi dabarana eribaiato. ⁹Enamo-vedaureato murinai vau, ḡia beḡe seḡaḡi-viniani tarimari mabarari ḡeri maḡuri vanaḡivanaḡi vaḡa-ḡorana tarimanai eiaḡoto. ¹⁰Ema Barau na evaḡa-ruḡaiato Rubu Veāḡa verena baregona Melkisedek kavana.

Asi boḡono mero-kaukau

¹¹Ḡia varina tu vovoka bita kiraḡirini, senaḡina moḡeri kiraḡi-viriḡiviriḡiri tu gwaḡiḡi, korana ḡomi tu asi ḡotuḡamaḡi-faka ḡarimoḡini. ¹²Mai nega mainai ḡomi tu vevaḡa-riba tarimami ai ḡoro iaḡo, be ḡoro vevaḡa-riba-ḡoi. Senaḡina ḡomi tu roḡo ḡourani ta na Barau ḡena guruḡa moḡoniri korari na ma bene vaḡa-ribami ḡotoni. Ḡomi tu roḡo lata ḡourani, ḡaniḡani gwaḡiḡiri tu asiḡina. ¹³Deikara lata roḡo eruruni tu roḡo mero keina. Ḡia tu veḡa iobukaiobukari ema veḡa asi roroḡotori vetoḡari tu roḡo asi ribana. ¹⁴A ḡaniḡani gwaḡiḡiri tu tarima baregori ḡari. Ḡia na tu ḡeḡauvei-iaḡi vanaḡivanaḡirini. Ḡeḡauvei-iaḡirini ḡarori ai tu tauḡeri maki ḡevevaḡa-ribani namo e rakava vetoḡari beḡene ḡita-leari ḡana.

6 ¹Moḡa lorinai namona tu Keriso ḡena vevaḡa-riba guruḡari tovtovonai riba guineri ḡeḡorani dagarari tu si-iaḡuiri. Benamo ḡia

ġena vevaġa-riba baregori ġana si-iaġo. Tovotovonai riba guineri ġeġorani dagarari moġo asi bitana vevaġa-riba-iaġi ġenoġoi-ġenoġoiri. Mo tu veirakava ġerina tuġamaġi-kure ma raka-kure e Barau ġenai veġabidadama. ²Babatiso vevaġa-ribari e ġima tarima iatari ai torekau, mase na variġisi-ġenoġoi e vevaġa-roroġoto vanaġivanaġi. ³Moġa tu bita veiani bema Barau na bevaġa-moġoniani nai.

⁴Bema tarima ta ġena veġabidadama beraga-kwaneani tu, kamara dabarai ma bevetuġamaġi-kureni? Ġia nuġana tu evaġa-mamaiato, ema guba na eiaġomato varevarena emami-tovoato, ema lauka Veaġa maki eġabiato. ⁵Ema Barau ġena guruġa namona edoġariato e vau ma beiaġomani tanobarana seġukari maki emamirito. ⁶Bema ġia veġabidadama na ma beketo-veġitani, ġia tu Barau Natuna ma evaġa-satauro ġenoġoiani, ema ġutuma barai ma etore-rosiani e evaġa-maiakaiani. Ġia ma novaġa-vetuġamaġi-kurea ġana tu asi dabarana ta.

⁷Ġaro vovoka ġura eraguni, benamo tano na mo nanu erimaiani. Benamo bema mo tano iatanai ġevaroni tarimari ġari ġaniġani namori bevaġa-ġorarini nai tu, Barau na mo tano namo beviniani. ⁸Senaġina ġau ma giniri ema ġauġa ma ġiniġiniri evaġa-gararini tanona tu asi ġena namo; Barau na mo tano bekiraġiani tu tano rakavana, ema dokonai tu begabuani.

⁹Ġatagu mabarami, moġoni, maiġesina ġavaġa-guruġa gwaġiġimini, senaġina ġatuġamaġi-gwaġiġini, ġomi tu namo baregona ema vevaġa-maġuri boġoa ġoitaġoani. ¹⁰Barau ġena veġa tu asi ġeġeva. Barau ġemi ġauvei ema ġia arana ġoura-viniani nai, ġena tarimarima ġovaġa-kavarito ema initoma roġo ġovaġa-kavarini tu asi betuġa-rekwarini. ¹¹Gai ġema ura baregona tu ġomi tata maniġesi moġo boġono ġauvei-kokore-iaġo, ġemi tuġamaġikau beġenea moġoni bene iaġo mo dokonai. ¹²Be asi beġene ġubulefimi, senaġina mo tarimarima ġeri veġabidadama e ġeri vevaġa-gwaġiġi ġerina mo kiraġitore ġeġabiani, boġono tovotovori.

Barau ġena kiraġitore

¹³Barau ġena kiraġitore guruġana Aberahamo ġenai eveiato tu tauġena aranai eguruġa-toreto, korana tu tarima ta ma asi varaġe ġia iatanai, aranai beguruġa-toreni lorinai. ¹⁴Ekirato, “Moġoni, ġoi tu bavaġa-namomuni ema besemu ġutuma bavanimuni.” ¹⁵Benamo Aberahamo evevaġa-gwaġiġito, asi eġubulefito mo Barau na ekiraġi-torerito dagarari ġenai ġefoforito.

¹⁶Tarimarima guruġatore gwaġiġiri mabarari ġeveini nai tu, tarima baregona ta ġia iataraġeri ai aranai ġeguruġa-toreni. Monana mo guruġatore guruġana gwaġiġina evaġa-moġoniani, benamo veġareveġare guruġari mabarari elauġaurini. ¹⁷Guinenai Barau ġena kiraġitore tu guruġatore guruġana gwaġiġinai eveiato. Korana ġia ġena ura ġia

na kiraġitore beġe ġaunaiani tarimari beġene riba-ginikau, ġia ġena kiraġitore tu asi bevekefoni. ¹⁸Mo guruġatore ruarua tu beġe tanuni, asi beġe vekefoni. Ema mo dagara ruarua ġerina ġita taribani, Barau tu asi beġofaġofani riba. Be ġita deidei rakava ġenana taraga-veġitato, benamo Barau ġenai taiāġomato tarimara tana kokore-korikori, be mo tuġamaġikau ġoirarai eruġa-taġoni tana ġabia. ¹⁹Mo tuġamaġikau taġabiato tu ġita ġera maġuri eġabi-tariani dagarana. Mai tuġamaġikau tu moġonina e asi eirauni. Ġia tu vekouġau dabuġana na murina ġana eraka-toġani, eiaġoni mo, veaġa lelevaġi daiġutuna nuġana ġana. ²⁰Mo ġana tu Iesu eiaġo-guineto ġita bene vaġa-maġurira uranai. Ġia tu Melkisedek ġena dabarai Rubu Veaġa verena baregonai betanu-vanaġi vanaġini.

Melkisedek tu Rubu Veaġa verena baregona

7 ¹Mai Melkisedek tu Salem vanuġa barana verena, ema ġia tu Iaru-korokoro Barauna ġena Rubu Veaġa verena. Ġia na Aberahamo edoġariato, vanuġa barari ġeri vere baregori o kini tari vetari ai evaġirito, benamo eġenoġoito-ġoi nuġanai, Aberahamo evaġa-namoato. ²Ema Aberahamo na vetari ai eġabirito farefareri, karava gabanana (10) eveirito, benamo karava ta Melkisedek eviniato. Melkisedek arana anina giniguinena tu “Veġa Iobukaibuka Verena”, ma arana ta tu “Salem Verena”, moġa anina tu “Maino Verena”. ³Ġia asi tamana, asi sinana, asi besena ta, ema ġena maġuri evesinato ġarona e ġena maġuri emagoto ġarona maki asiġina. Ġia tu Barau Natuna kavana etanuni, Rubu Veaġa verena vanaġivanaġi.

⁴Melkisedek ġoġitaia, ġia tu tarima arana barego lelevaġi, korana Aberahamo tu senera baregona na maki vetari ai eġabirito farefareri karava gabanana (10) ġerina ta ġia eviniato. ⁵Taravatu ekirani, Levi besena Rubu Veaġa verena dagina beġe ġabiani tarimari tu karava gabanana ġerina ta beġene gogo Isaraela tarimari ġerina, mo tu tarikaka ġerina. Moġoni, tarikakari maki Aberahamo ġena bese tarimari, senaġina ġia ġerina beġene gogo. ⁶Melkisedek senena tu dia Levi ġenana eiaġomato, senaġina Aberahamo ġenana karava ta eġabiato. Ma ġia na Barau ġena kiraġitore eġabiato tarimana evaġa-namoato. ⁷Asi bita daradara-iaġiani, tarima baregona na tarima keina vevaġa-namo eviniani. ⁸Levi senena, karava gabanana ġerina ta ġeġabiato doġorori, tu ma ġemaseto-ġoi. A Melkisedek na maki karava ta eġabiato, senaġi ġia tu Buka Veaġa na ekiraġiani asi emaseto. ⁹Benamo maġesi ma nakira, Levi maki karava gabanana ġerina ta ġeġabiato-ġoi tarimana. Ġia na Aberahamo ġenana Melkisedek karava ta ma evini-ġoiato.

¹⁰Korana Melkisedek na Aberahamo eġoitaġoato ġaronai tu, Levi tu roġosi roġo bene maġuri, roġo ġatana Aberahamo tauġaninai.

Iesu tu Melkisedek kavana

¹¹Guinenai Barau na Isaraela tarimari taravatu evinirito. Mo taravatu ekirani, Levi besena na ginitaḡo veaḡa ḡauveina beḡene veia. Senaḡi bema Levi besena ḡeri Rubu Veaḡa verena ḡenana e ḡeri ḡauvei seḡukana na mo namo vedaurea beḡere ḡabia nai tu, kara dainai Barau tu ma ekirato, Rubu Veaḡa verena ta ma betuḡuani Melkisedek ilailanai, ma dia Arona kavana? ¹²Korana bema ginitaḡo ḡauveina ḡeveiani tarimari ḡeri doḡoro ḡesenisito nai tu, taravatu maki besenisini. ¹³Korana Iesu mai takiraḡiani tarimana tu irau doḡoro. ḡia ḡena doḡoro tarimana ta fata veaḡana iatanai ginitaḡo ḡauveina asi eveito. ¹⁴Korana ribara, ḡita ḡera Vereḡauka tu Iuda besena na emaḡurito. Ma Mose na Rubu Veaḡa vereri ekiraḡirito-ḡoi nai tu, Iuda doḡorona tu asi ekiraḡiatio.

¹⁵Ema kara bita kiraḡia toma tu bita ḡitafaka-ginikauani, korana Rubu Veaḡa verena ta ma befori Melkisedek kavana. ¹⁶ḡia tu dia senena kavari, taravatu seḡukanai Rubu Veaḡa verenai eiaḡoto, senaḡina maḡuri vanaḡivanaḡi ḡenana eiaḡomani seḡukana na Rubu Veaḡa verenai eiaḡoto. ¹⁷Korana Barau na maiḡesi ekiraiato, ekirato,

“ḡoi tu Rubu Veaḡa verenai
botanu-vanaḡi vanaḡini
Melkisedek kavana.”

¹⁸Mo taravatu guinena tu etore-veḡitaiato, korana ḡia tu asi seḡukana ema asi bevevaḡa-maḡurini riba. ¹⁹Korana Mose ḡena taravatu na dagara ta tu asi evaḡa-namo vedaureaiato. Moḡesina naima Barau na tuḡamaḡikau lagilagina ta ma etore-rosiato, moḡa ḡenana ḡita Barau sevina ḡana bita raka-kavini.

²⁰Barau na Iesu tu guruḡatore guruḡana gwaḡiḡina eveiato vau, Rubu Veaḡa verenai etoreato! A Rubu Veaḡa vereri mabarari ḡeri ai tu guruḡatore ta asi eveiato. ²¹Senaḡi Iesu Rubu Veaḡa verenai eiaḡoto tu Barau na guruḡatore gwaḡiḡina eveiato vau. Barau na maiḡesi ekiraiato, “Vereḡauka tu eguruḡa-foforito
ma ḡena tuḡamaḡi asi ma bekefoani:
‘ḡoi tu Rubu Veaḡa verenai botanu-vanaḡi vanaḡini.’”

²²Mai guruḡatore guruḡa gwaḡiḡina lorinai, Iesu tu ginitaḡo variḡuna ma namona korikori vaḡa-moḡoninai eiaḡoto.

²³Guinenai Rubu Veaḡa vereri tu vovoka, korana tu ḡemaseto-ḡoi, be ta Rubu Veaḡa verenai asi etanu-rovaḡito. ²⁴A Iesu tu etanu-vanaḡi vanaḡini lorinai, ḡia tu Rubu Veaḡa verenai betanu-rovaḡini. ²⁵Moḡa lorinai deikara ḡia ḡenana Barau ḡenai beḡe iaḡoni tu bevaḡa-maḡuririni riba. Korana Iesu tu ḡia urari ai Barau ḡenai bene ḡauḡau ḡana etanu-vanaḡi vanaḡini.

²⁶Maiḡesi Rubu Veaḡa verena baregona na ḡita ḡera ura dagarari evinirani. ḡia tu veaḡa, asi ḡena vei-rakava, vetoukau ta ḡenai asiḡina,

namo vedaurea; ġia tu vei-rakava tarimari kavana asiġi. Ma Barau na guba tuġuna korikorinai ea toreato. ²⁷Ġia tu dia guinenai Rubu Veaġa vereri baregori kavana, ġaro korikoriri ai varevare dagarari bevinini. Guine tu ġia ġena vei-rakava Barau na bene tuġamaġi-fitoġari ġana evinito, ma moġa murinai tu tarimarima ġeri rakava Barau na bene tuġamaġi-fitoġari ġana. Ġia tu vaġa-sebona moġo tarimarima ġeri vei-rakava ġana ginitaġo varevarena eviniato. Moġa tu ġia tauġena ginitaġo varevarenai eiaġoto, benamo Barau ġenai evevini-raġeto. ²⁸Mose ġena taravatu na tu ma ġeri moira tarimari Rubu Veaġa verena baregonai etorerito-ġoi. Senaġina Barau ġena guruġatore guruġana gwaġiġina, Mose ġena taravatu murinai ema foforito dagarana, na tu Barau Natuna evaġa-ruġaiato. Ġia tu Barau na evaġa-namo vedaureaiato, ma namo vedaurea betanu-vanaġi vanaġini.

Iesu tu ġita ġera Rubu Veaġa verena baregona

8 ¹Ġai na kara ġakiraġiani tu maiġa. Ġita tu ma ġera Rubu Veaġa verena baregona. Ġia tu gubai Iaru-korokoro Barauna ġena terona aroribanai etanu-tarito. ²Barau ġena veaġa gabuna nuġanai eġauveini. Mo tu farai rubuna korikori Vereġauka na eragaiato, dia tarimarima na ġeragaiato.

³Rubu Veaġa vereri baregori mabarari tu ġevaġa-ruġarito, varevare dagarari ema boromakau, mamoe, manu beġene vini ġana. Moġa lorinai mai Rubu Veaġa verena baregona, Keriso, maki ma ġena dagara tari, bene vini ġana. ⁴Bema ġia tanobarai bere tanu tu, Rubu Veaġa verenai asi bere iaġo, korana tu maiġa, Rubu Veaġa vereri tu varau ġetorerito maiġeri, varevare dagarari ġevini-tanuni, Iuda ġeri taravatu ekiraġiato ilailanai. ⁵Ġia varevare dagarari mainai veaġa lelevaġi daiġutunai ġevinini tu, gubai mo veaġa lelevaġi daiġutuna kavana e vetoġana moġo. Moġesina nai Barau na Mose toma-rakariġo ġana farai rubuna bene ragaia ġana, naima ekira-toreġauato, ekirato, “Bono ġitaia, dagara mabarari boveirini nai tu, ġoro ai avaġa-ġitamuto ilailanai moġo bono veiri.” ⁶Senaġina toma Iesu na ginitaġo varevareri vini-toreġau veigana guinenai Rubu Veaġa vereri ġeri ġauvei evanaġiato. Korana Barau ġena kiraġitore variġunai Iesu tu Barau e tarimarima vekaravari ai eruġani, ginitaġo variġuna bene vaġa-seġukaia ġana, ma mai ginitaġo na mo ginitaġo guinena seġukana evanaġiani. Ema Barau ġena kiraġitore variġuna na mo ginitaġo guinena kiraġitorena maki evanaġiato. ⁷Bema mo ginitaġo guinena asi ġena rakava tu, Barau na ginitaġo variġuna ta asi ma bere kiraġia. ⁸Senaġina Barau na tarimarima ġeri ai rakava eġoitaġoto naima ekirato,

“Vereġauka eguruġa-foforini,

‘Boġono seġaġi, ġaro ta mani eiaġomani,

au na ginitaḡo variḡuna ta ma baveiani,
Isaraela besena e Iuda besena ḡeri.

9¹ Mai ginitaḡo tu dia guinenai ḡia seneri ḡeri aveiato moḡa kavana.
Dia mo ḡaro ai ḡimari ai aḡabito,
benamo Aigupito na aḡori-rosirito ginitaḡona kavana.
Korana ḡia tu au ḡegu ginitaḡo ḡenai
asi ḡevetuḡamaḡikauni naima,
au na araga-kwanerito,'
Vereḡauka tu moḡesina eguruḡani.

10 Vereḡauka ma ekirani,
'Ḡoira ḡarori ai au na mai ginitaḡo Isaraela besena ḡeri ma baveiani:
Au ḡegu taravatu ḡia debari ai batore-toḡarini ema ḡia nuḡari ai
batorerini.
Au tu ḡia ḡeri Barau ai baiaḡoni ema ḡia maki au ḡegu tarimarimai
beḡe iaḡoni.

11 Tarima ta na sevinai etanuni tarimana asi ma bevaḡa-ribaiani,
ema tarima ta tarikakana asi bekiraiani,
'Vereḡauka noribaia!'
Korana mabarari na beḡe ribaguni,
misina na beiaḡoni mo baregona.

12 Ḡeri kira-sirivaḡi batuḡamaḡi-fitoḡarini,
ema ḡeri rakava mabarari asi ma batuḡamaḡirini.' ”

13 Barau na mai ginitaḡo maiḡa ekiraḡiani, “ginitaḡo variḡuna” etoni
nai tu, ḡia na mo ginitaḡo tovotovonai moḡa tu guinena na ekiraḡiani.
Ma kara eguinenani e erakavani tu asikauna berekwarekwani.

9 ¹Ginitaḡo guinena tu ma ḡena taravatu misimisiri toma-rakariḡo
ḡana, ema ma ḡena gabu veaḡana maki. Mo gabu veaḡana tu
tanobarai etanuni dagarana. ²Barau toma-rakariḡona ḡana farai rubuna
ta ḡeragaiato. Mo farai rubuna nuḡanai daiḡutu giniguinena tu Veaḡa
Gabuna ḡetato. Ḡia nuḡanai tu lamefa torekauna dagarana, teibolo e
Barau ḡeviniato berediri. ³Kouḡau dabuḡana vaḡa-ruaruana murinai tu
daiḡutu ta maia. Moḡa tu Veaḡa Lelevaḡi Gabuna ḡetato. ⁴Ḡia nuḡanai
tu golo fatana, goḡu ma bonana iatanai beḡene vei ḡana, ema Kiraḡitore
Mauḡana; ḡia murikana mabarana tu golo na ḡeveiato. Ma mauḡa
nuḡanai tu golo ḡurona ta, nuḡana ma manana e Arona ḡena togoi,
egarakauto dagarana, ema fore ruarua Barau na iatari ai taravatu etoreto
foreri. ⁵Mo mauḡa iatanai tu kerubi ruarua ḡevaḡa-ruḡa veḡoirarito. Mo
kerubi tu ḡau garagarari, vetoḡari tu aneru kavari. Ta tavi ta dudu ai
ḡevaḡa-ruḡaiato, ma ta maki tavi ta dudu ai, ma faneri ḡekeorito, benamo
rakava voivaḡiri gabuna ḡegoru-tariato. Mo kerubi ruarua na tu Barau
ḡena mareva baregona ḡekiraḡiani. Senaḡi maiḡeri dagara misikoseri
mabarari tu toma asi baḡa kiraḡirini.

⁶Dagara mabarari moġesi ġeveirito murinai, Rubu Veāga vereri ġaro vanaġivanaġi daiġutu giniguinena nuġanai ġeraka-toġato-ġoi, benamo ġeri ġauvei ġeveirito-ġoi. ⁷Senaġi rubu verena baregona ġereġana moġo laġani ta nuġanai vaġa-sebona daiġutu vaġa-ruaruana nuġanai eraka-toġato-ġoi. Gena rakatoġa ġarori mabarari ai tu rara maki eġabi-taġoato-ġoi. Mo rara ġia na tu rakava tuġamaġi-fitoġari ġana ginitaġo dagarana evaġa-iaġoato-ġoi. Guine tu ġia ġena rakava ġana evinito-ġoi ema murinai tu tarimarima ġeri rakava ġana. Mo rakava tu asi ribari nai ġeveirito-ġoi rakavari. ⁸Iauka Veāga na maiġeri veġa mabarari ġerina ġita tu maiġesina evaġa-guruġarani: Bema Barau toma-rakarigona ġana farai rubuna giniguinena roġo eruġa-taġoni nai tu, Veāga Lelevaġi Gabuna rakatoġa dabarana tu roġosi roġo bene vekeo. ⁹Mo farai rubuna tu toma mai negai kara beġe ġorani evaġa-foforiani. Mai farai rubuna nuġanai varevare dagarari e ginitaġo dagarari vaġa-ilailana boromakau, mamoe, manu Barau ġeviniato-ġoi dagarari mabarari na ġetoma-rakarigoto-ġoi tarimari nuġari asi ilaila beġe iarevarini. ¹⁰Korana mo Barau ġeviniato-ġoi dagarari tu ġaniġani e niuniu dagarari, ema tarima beġene iareva ġana veġuriġi maġuriri irauirau. Mai tu mabarari tauġani taravaturi moġo. Barau na tarimarima evinirito beġene korana-iaġiri, bene iaġo mo, ġaro ta, dabara variġuna bevaġa-ruġaiani.

Iesu rarana

¹¹Senaġi Keriso tu dagara namori ġema-foforito ġeri Rubu Veāga verena baregona. Ġia tu farai rubuna barana e namo vedaureana nuġana na eraka-toġato. Dia tarimarima na ġeragaiato farai rubuna, korana mo farai rubuna tu dia mai tanobara dagarana. ¹²Keriso tu dia nanigosi o boromakau naturi rarari seġukari ai mo rubu ai eraka-toġato. Senaġi ġia tu ġia rarana seġukanai Veāga Lelevaġi Gabuna nuġanai vaġa-sebona moġo eraka-toġato. Benamo ġita eġabivaġi-moġovaġirato rakava ġena seġuka na. ¹³Nanigosi ma boromakau rarari ema boromakau natuna variġuna ġegabuato kauna, Rubu Veāga vereri na vei-rakavai ġemiroto-ġoi tarimari iatari ai misimisiri ġefiu-kaurito-ġoi. Moġesina ġeveirito-ġoi tu tarimarima tauġaniri ġevaġa-veaġarito-ġoi Barau ġoiranai. ¹⁴Senaġi Keriso rarana na moġeri evanaġirito. Korana ġita nuġara, mase ġevaġa-ġoraiani ġauveiri ġerina, eiarevarato, maġuri Barauna ġena vetuġunaġi bitana iaġo-vini ġana. Keriso tu asi vetoukauna ta, tauġena tanu-vanaġivanaġi laukana ġenana evevinito Barau ġenai.

¹⁵Ginitaġo variġuna nuġanai Keriso tu Barau e tarimarima fakari ai eruġani. Korana tu Barau na ekearito tarimari mabarari na ekiraġi-toreato maġuri vanaġivanaġina beġene ġabia. Moġesi nai Keriso emaseto, tovotovona ginitaġona nuġanai tarimarima ġevei-rakavato ġeri rakava na bene ruġa-vaġiri ġana.

¹⁶Tarima ta roḡosi bene mase nuḡanai, beurani bene guruḡa-fofori, bemaseni nai tu, natuna na ḡena farefare bene ḡabiri. Mo ura o guruḡa-fofori tu fefai betoreani ḡia ḡena kiraḡitore guruḡana. Natuna na mo farefare asi roḡo beḡabirini bene iaḡo mo, tamana ḡena mase tarimarima ḡoirari ai bevaḡa-moḡoniani vau. ¹⁷Korana tu mo ura ḡetoreani fefana tu eguruḡa-foforini tarimana bemaseni vau ma ḡena seḡuka, a bema ḡia roḡo maḡuri tu, mo ura ḡetoreani fefana tu asi seḡukana. ¹⁸Moḡesina nai ginitaḡo giniguinena maki rarana vau evaḡa-seḡukaiato-ḡoi. ¹⁹Korana Mose na taravatu guruḡari mabarari tarimarima ḡeri evarifiu-ḡosiato-ḡoi murinai, boromakau naturi variḡuri e nanigosi rarari eḡabirito-ḡoi, benamo nanu ḡesi egiro-sebonarito-ḡoi. Moḡa murinai isopo legana vulu kakakakana na ḡebaruato dagarana mo rara ma nanunai efereiato-ḡoi. Benamo Mose na mo isopo legana ma vulunai rara tu taravatu bukana e tarimarima iatari ai efiukaurito-ḡoi. ²⁰Mose ekirato, “Mai rara tu ginitaḡo vaḡa-moḡonina dagarana Barau na ekiramito boḡono korana-iaḡia.” ²¹Farai rubuna ema mo rubu nuḡanai toma-rakarigo ai ḡeḡauvei-iaḡirito-ḡoi farefareri mabarari iatari ai veḡa sebona eveiato-ḡoi. Iatari ai rara misimisiri efiufiukauto-ḡoi. ²²Moḡoni, taravatu ekirani ilailanai, dori dagarana mabarari tu rara na beḡe iarevani. Korana rara asi berigo ni nai tu, vei-rakava tuḡamaḡi-fitoḡari maki asiḡina.

²³Senaḡina maiḡeri mai tu guba dagarari iouiouri moḡo maiḡesi ḡeiarevarini. A gubai korikoriri ḡetanuni dagarari iareva-iarevari ḡana ginitaḡo varevarena tu namona lelevaḡi. Maiḡeri ginitaḡo varevareri evanaḡirini. ²⁴Korana Keriso tu dia tarimarima na ḡeveiato veaḡa lelevaḡi daiḡutuna nuḡanai eraka-toḡato. Iesu tu guba korikorinai eraka-toḡato. Ma maitoma tu ḡita urarai Barau ḡoiranai efoforini. Mo tarima na ḡeveiato moḡa tu gubai veaḡa lelevaḡi daiḡutuna moḡo ḡevaḡa-ilailaiato. ²⁵Rubu Veaḡa verena baregona tu laḡani tata nuḡari ai Veaḡa Lelevaḡi Gabunai rara eḡabi-toḡato-ḡoi. Keriso moḡesina tu asi eveini. Ḗia tu dia gubai eraka-toḡato murinai vau vanaḡivanaḡi tauḡena ginitaḡo varevarenai eiaḡoni, benamo Barau ḡenai evevinini. ²⁶Moḡesina tu tanobara evesinato na veḡata bene midigumidigu. Senaḡi mai tanobara magona eḡabi-iaḡoani, mainai vau vaḡa-sebona moḡo ema foforito. Mo tu ginitaḡo varevarenai evevaḡa-iaḡoto rakava bene ḡabi-veḡitari ḡana. ²⁷Evetoreto, tarimarima mabarari tu vaḡa-sebona moḡo beḡe maseni, ma murinai tu Barau na bevaḡa-kotarini. ²⁸Keriso kavana vaḡa-sebona moḡo ginitaḡo dagarana eiaḡoto, tarimarima mabarari ḡeri rakava bene ḡabi-veḡitari ḡana. Senaḡi ḡia tu ma bema-fofori ḡenoḡoini. Mo tu dia rakava ma benema ḡabi-vaḡiri ḡana, senaḡina deikara ḡia ḡenaritaḡoani tarimari vaḡa-maḡuriri ḡana.

Ginitaḡo guinena na rakava asi beḡabi-veḡitarini

10 ¹Mose ḡena taravatu tu dagarana namori vau beḡe ḡorani iouiouri moḡo, dia dagarana tauri korikori. Ḗia na mo ginitaḡo dagarari

laḡani laḡani ḡevinito-ḡoi, senaḡina mo ginitaḡo dagarari na toma-rakariḡo ḡeiḡoto-ḡoi tarimari asi evaḡa-namo vedaurearito. ²Bema mo ginitaḡo dagarari na ḡetoma rakariḡoto-ḡoi tarimari beḡere vaḡa-namo vedaureari nai tu, asi ma beḡere ginitaḡo-ḡenoḡoi. Korana ḡia tu ḡere iareva-moḡovaḡi, ema ma ḡeri vei-rakava guineri mamiraḡiri asi ma ḡere ḡabi-ḡenoḡoiri. ³Senaḡi mo ginitaḡo veiḡari laḡani tatai ḡeveirito-ḡoi veiḡari na tu mo laḡani tata nuḡari ai ḡevei-rakavato-ḡoi, moḡeri ḡekiravararito-ḡoi. ⁴Korana tu boromakau e nanigosi rarari na rakava tu asi ilaila beḡabi-veḡitarini. ⁵Moḡa lorinai Keriso tanobara ḡana eiaḡomato nai tu ekirato,

“Ḡoi tu ginitaḡo dagarari vaḡa-ilailana boromakau, mamoe, nanigosi ema varevare dagarari asi ourani, senaḡi tauḡani ta ovei-toreato au ḡegu.

⁶Karava na boromakau, mamoe, nanigosi eḡararini, ema vei-rakava bono ḡabi-vaḡiri ḡana ginitaḡo varevareri ḡeveini ḡeri ai maki asi oiakuni.

⁷Moḡesi naima au akirato,

‘Barau o, au tu iniḡegu,

Buka Veḡai tu au ḡekiraḡiguto, au baiḡoma tu ḡoi ḡemu ura bana veia ḡana.’ ”

⁸Keriso ḡena guruḡa giniguinena tu maiḡa, “Ḡoi tu ginitaḡo dagarari e varevare dagarari asi ourani. Karavai ḡegaburini varevareri e vei-rakava bono ḡabi-vaḡiri ḡana ginitaḡo varevareri ḡeveini maki asi oura-vinirini, ema ḡeri ai asi oiakuni.” Maiḡeri veiḡa tu taravatu na ekiraḡirini ilailanai, senaḡi ḡoi na tu asi oiaku-iaḡirini. ⁹Moḡesi nai ma ekirato, “Barau o, au tu iniḡegu, au baiḡoma tu ḡoi ḡemu ura veiḡana bana veia ḡana.” Benamo ginitaḡo veiḡana giniguinena etore-veḡitaiato, benamo moḡa gabunai tu ta ma evaḡa-ruḡaiato. ¹⁰Benamo Barau ḡena ura lorinai, Iesu Keriso tauḡanina ginitaḡo dagarana i evaḡa-iaḡoato vaḡa-sebona moḡo. Benamo monana ḡita evaḡa-veaḡarato.

¹¹Rubu Veḡa vereri mabarari ḡaro vanaḡivanaḡi tata ḡeruḡa-tarito-ḡoi, benamo mo ginitaḡo ḡauveiri ḡeveirito-ḡoi. Senaḡi ḡeri ginitaḡo dagarari tu dagara sebori moḡo ḡevinito-ḡoi vanaḡivanaḡi. Ema mo ginitaḡo dagarari na rakava tu asi ḡeḡabi-veḡitarito-ḡoi. ¹²Senaḡi Keriso na rakava ḡabivaḡiri ḡana tu ginitaḡo sebona moḡo eveiato ḡaro mabarari ḡana. Benamo moḡa murinai Barau ḡimana aroribanai ea tanu-tarito. ¹³Mo negai beiaḡoma maitoma tu evenarini, beiaḡoni mo, ḡia ḡevetari-viniani tarimari mabarari Barau na ḡia kwakuna fanakauna dagarana i betore-taririni. ¹⁴Korana ginitaḡo dagarana sebona na moḡo evaḡa-veaḡarito tarimari evaḡa-namo vedaurearito. Ma ḡia tu namo vedaurea beḡe tanuni, vanaḡivanaḡi.

¹⁵Iauka Veḡa na maki evaḡa-ribarani. Guine tu ekirato,

16 “Veregāuka ekirani,
 ‘Moġeri ġaro muriri ai,
 au ġia ġeri tu mai ginitaġo baveiani.
 Au ġegu taravatu ġia nuġari ai batore-toġarini,
 ema ġia debari ai baberarini.’ ”

17Ema ma ekirato,
 “Ġia ġeri vei-rakava e veiġa ġeġevaveġevari asi ma
 batuġamaġi-ġenoġoirini.”

18Maiġeri etuġamaġi-fitoġarito nai tu, rakava ġabi-veġitari ġana varevare
 dagarana ta tu asiġina maia.

Barau sevina ġana siraka-kavi ma tuġamaġi kokorera ġesi

19Moġa lorinai, tarikakagu, ġita tu nuġara gwaġiġi Iesu rarana
 ġenana Veaġa Lelevaġi Gabunai bita raka-toġani. 20Mo vekouġau
 dabuġana o ketin evedare-kikimato, monana Keriso na ġita ġera maġuri
 dabarana variġuna ekeo-fakaiato. Mo vekouġau dabuġana tu Keriso
 tauġanina. 21Ġita tu ma ġera Rubu Veaġa verena baregona, Barau ġena
 numa eġita-taġoani. 22Ġita nuġara tu eiarevarito rakava mamiraġiri
 ġerina, ema tauġanira maki nanu namo vedaureana na eġuriġirito.
 Moġesi naima Barau ġenai siraka-kavinaġi nuġara ma moġoniri ġesi
 e ma ġera veġabidadama korikoriri ġesi. 23Ġera tuġamaġikau tavaġa-
 moġoniani dagarana ġenai tana veġabi-gigitari, asi tana ġareva-ġareva.
 Korana Barau na kara ekiraġi-toreato tu beveiani. 24Ema karora bitana
 tuġamaġiri kamasi tata bita vaġa-kavarini, benamo beġe veura-vinini,
 ema ġauvei namori beġe veini. 25Ġita ġera raka-vegogo ai bitana fofori-
 ġoi, asi bitana tanu, tari ġeveini kavana. Senaġi karora ġesi velaunaġi
 bitana vaġa-baregoa. Korana tu tauġemi na varau ġoġitaiani, Keriso ġena
 iaġoma ġarona tu mai ekavinaġi-rakavani.

26Bema guruġa moġonina taribaiani murinai, ma taġiġiraġeni,
 benamo tavei-rakavani nai tu, bitana riba, rakava ġabi-veġitari ġana,
 ginitaġo dagarana ta tu asiġina maia. 27Senaġi ma garira ġesi kara ġoirai
 ġerai beġorani, moġa moġo bitana nari-taġoa. Mo tu Barau ġena Kota
 Baregona, ema Barau ġevetari-viniani tarimari e iaukari beġararini
 karavana. 28Tarima ta na Mose ġena taravatu asi ekorana-iaġiato-ġoi,
 benamo ġeġita-kauato-ġoi tarimari ruarua o toitoi na ġekiraġi-foforiato-
 ġoi. Mo tarima tu ġevaġi-maseato-ġoi, asi ġevetuġa-ġwaiato-ġoi. 29Ġomi
 ġotuġamaġini, Barau Natuna deikara na kwakuna fanakauna dagarana
 evaġa-iaġoani tarimana tu kamasi? Mai tarima tu rakava voina baregona
 beġabiani. Ġia na tu mo ginitaġo rarana, ġia evaġa-veaġaiato dagarana,
 asi veaġa raranai evaġa-iaġoani. Ema varevare-bara Iaukana ġenai maki
 veiġa rakava kwaikwaina eveiani. 30Korana ġita ma ribara Barau ekirato,
 “Rakava voina tu au na bavaġa-voiani, au na bavini-ġenoġoiani.” Ema

ma ekirato, “Vereḡauka na ḡena tarimarima beḡita-viriḡirini.” ³¹Maḡuri Barauna ḡimanai boketo-raḡeni tu garina maki asikeikeina.

³²Ḡaro guineri ḡotuḡamaḡi-ḡenoḡoiri. Barau ḡena mama ḡoḡabiato murinai, midigumidigu barego ḡodoḡarito, senaḡi ḡoruḡa-gigitarito.

³³Negatari ai tu ḡutuma bara ḡoirari ai ḡevaḡa-maiakamito-ḡoi, ma ḡevaḡa-midigu midigumito-ḡoi. Ema negatari ai tu ḡomi kavana ḡevaḡa-midigu midigurito-ḡoi tarimari seviri ai ḡoruḡa-tarito-ḡoi, ḡoruḡa-duku dukurito-ḡoi. ³⁴Ḡediburarito tarimari ḡesi ḡomidigumidigu sebonato-ḡoi, ema ḡemi fafare ḡeverarimito-ḡoi maki ḡoiaku-iaḡirito-ḡoi moḡo. Korana ma ribami, ḡomi tu ma ḡemi fafare namori, beḡe tanu-vanaḡi vanaḡini dagarari.

³⁵Moḡa lorinai ḡemi tuḡamaḡi kokore maniḡa asi boḡono fitoḡari. Korana maniḡa voina tu barego lelevaḡina boḡoa ḡabiani. ³⁶Boḡono vevaḡa-gwaḡiḡi, korana Barau ḡena ura veiḡana boḡo vaḡa-koriani murinai tu, kara ekiraḡi-toreato mabarana boḡo ḡabiani. ³⁷Korana Buka Veaḡa ekirani,

“Nega tu misina moḡo,

ma beiaḡomani etoni tarimana tu beiaḡomani, asi bekwaiboni.

³⁸Au ḡegu vei-iobukaiobuka tarimana tu ḡena veḡabidadama lorinai bemaḡurini.

Senaḡi murina ḡana ma beraka-ḡenoḡoini nai,

au tu asi baiakuni ḡia ḡenai.”

³⁹Senaḡi ḡita tu murira ḡana asi ma bita raka-ḡenoḡoini, benamo bita rekwarekwani. Asiḡina, ḡita tu ma ḡera veḡabidadama, be maḡuri bita ḡabiani.

Veḡabidadama tarimari

11 ¹Veḡabidadama anina tu mai-ḡesi. Tatuḡamaḡi-dadamaḡirini dagarari tavaḡa-moḡoni korikoririni. Matarai roḡosi bitana ḡitari, senaḡina tavaḡa-moḡoni korikoririni, moḡeri dagara tu moḡoni ema bita ḡabirini. ²Sene tarimari tu ḡeri veḡabidadama lorinai, Barau na eḡabi-raḡerito.

³Taveḡabidadamani lorinai taribani, Barau eguruḡato, benamo guba e tanobara evetoreto. Moḡa lorinai mai taḡitarini dagarari tu Barau na asi taḡitarini dagarari ḡerina eveirito.

⁴Abela tu ma ḡena veḡabidadama Barau ḡenai lorinai, Barau eviniato varevare dagarana na Kaino ḡena varevare dagarana evanaḡiato. E ma ḡena veḡabidadama lorinai, Barau na ḡena varevare dagarana ekiraḡiato varevare namona ema Barau na evaḡa-moḡoniato ḡia tu vei-iobukaiobuka tarimana. Ma Abela tu varau emaseto, senaḡina ḡena veḡabidadama lorinai roḡo eguruḡani.

Abela, Enoka, Noa

⁵Enoka ma ḡena veḡabidadama lorinai, Barau na eḡabi-varaḡeato moḡo, asi emaseto. Ma tarimarima na maki asi ḡedoḡariato, korana

Barau na eḡabi-vaḡiatio. Roḡosi bene ḡabi-veḡitaia nuḡanai, Barau ḡena bukai ekirani, Enoka na Barau iauna evaḡa-iakuato. ⁶Asi ḡena veḡabidadama tarimana na Barau tu asiḡina ḡinavaḡi bevaḡa-iakuani. Korana deikara Barau ḡenai eiaḡomani tarimana tu bene vaḡa-moḡoni Barau tu maḡuri etanuni. Ema Barau ḡevetauani tarimari mabarari tu voiri namori Barau na bevinirini.

⁷Noa ma ḡena veḡabidadama lorinai, Barau na ḡoirai beḡe ḡorani dagarari ekira-toreḡauato. Mo tu Noa na roḡosi bene ḡitari dagarari. Noa na Barau evaḡa-moḡoniato, benamo ma garina ḡesi bouti ta eragaiato, ḡaraḡona e natuna bene vaḡa-maḡuriri ḡana. Ḡia ḡena veḡabidadama na tanobara tarimari ekiraḡi-foforirini rakava tarimari. Ma ḡia tu ḡena veḡabidadama lorinai Barau na ekiraiato vei-iobukaiobuka tarimana. Mai vei-iobukaiobuka tu veḡabidadama ḡenana eiaḡomani dagarana.

Aberahamo

⁸Aberahamo ma ḡena veḡabidadama lorinai, Barau na ekeaiato nai eseḡaḡiatio. Barau na ekeaiato tu ḡena vanuḡa bene raga-kwanea, ma Barau na tanobara ta ma beviniani, mo ḡana bene iaḡo. Benamo Aberahamo eraka-rosito moḡo, asi ribana aiḡana eiaḡoni senaḡi eiaḡoto moḡo. ⁹Ma ḡena veḡabidadama lorinai, Barau na ekiraḡi-toreato tanobaranai ea vanuḡato. Ma monai tu noḡa moḡo tanukau tarimana ta tanobara borunai etanuni kavana. Isako e Iakobo kavana farai numari ai ḡetanuto-ḡoi. Maiḡeri tarima toitoi tu Barau ḡena kiraḡitore ḡeḡabiatio. ¹⁰Korana Aberahamo tu vanuḡa baregona evaḡa-nogaiato-ḡoi. Mo vanuḡa tu fore baregona iatanai beruḡakauni. Mo vanuḡa tu Barau tauḡena na beboiḡaiani e beragaiani.

¹¹Veḡabidadama lorinai Sara na kokore eḡabiatio bene ḡabi ḡana, ema eḡauka-rakavato, senaḡi mero keina evaḡa-maḡuriatio. Ḡia ma ribana, Barau na kara ekiraḡi-toreato dagarana tu beḡorani. ¹²Benamo mai tarima sebona eḡauka-rakavato, senaḡi ḡia ḡenana senena ḡemaḡurito tu guba visiḡuri kavana vovoka tabutabu, ema kone mirina kavana asi iavi-iavina.

¹³Maiḡeri tarimarima mabarari tu veḡabidadamai ḡetanuto-ḡoi nuḡanai ḡemaseto. Barau na ekiraḡi-torerito dagarari ḡia na tu asi ḡeḡabito, senaḡi manaḡai moḡo ḡeḡita-guinerito, benamo ḡeḡabi-raḡerito. Ema ḡeguruḡa-foforito ḡia tu tanobara boruna tarimari. Ḡia mai tanobarai tu ḡetanukauni moḡo. ¹⁴Moḡesina ḡeguruḡani tarimari tu ḡeri guruḡa na ḡevaḡa-foforirini, ḡia tu ḡeri tanobara korikorina ḡevetauani. ¹⁵Bema ḡeraga-kwaneato tanobarana ḡere tuḡamaḡi-ḡenoḡoia nai tu, ma dabara ḡere ḡenoḡoi. ¹⁶Senaḡi ḡia tu tanobara namo vedaureana ḡeuravini-rakavaiato-ḡoi. Mo tu gubai etanuni dagarana. Moḡa lorinai Barau tu asi emaiakaiani, ḡia ḡeri Barau ḡetoni nai, korana Barau na ḡeri vanuḡa baregona ta eraga-toreato.

¹⁷Aberahamo tu ma ġena veġabidadama. Moġesina nai Barau na etovonaġiato nai tu, natuna Isako ginitaġo dagaranai evaġa-iaġoato, benamo Barau ma evarevare-viniato. Aberahamo ribana, Barau na kiraġitore tu ġia eviniato, senaġina ġia natuna sebona kwariġutu moġo tu ginitaġo dagarana ġana bene vaġia etato. ¹⁸Barau na Aberahamo maki maġesina ekiraiato, ekirato, “Isako ġenana moġo ġoi senemu beġe maġurini.” ¹⁹Aberahamo etuġamaġito tu Barau na Isako ma bevaġa-maġuri ġenoġoiani riba. Moġesina naima iniġesina ma sikiraġia: Aberahamo na Isako mase na eġabi-ġenoġoiato.

Isako, Iakobo, Iosefa

²⁰Isako ma ġena veġabidadama lorinai, Iakobo e Esau evaġa-namorito, ema ġeri ai vau beġea ġorani dagarari ekiraġirito.

²¹Iakobo ma ġena veġabidadama lorinai, dori emaseto-ġoi nuġanai tu Iosefa natuna ruarua evaġa-namorito, ema ġena togoi ġenai eveġabiritoġoto, benamo Barau etoma-rakarigo viniato.

²²Iosefa ma ġena veġabidadama lorinai, eġauka-dorudoruto, dori emaseto-ġoi nuġanai tu, Isaraela tarimari Aigupito na beġe raka-vaġini ekiraġiato, ema turiġana kamasi beġene veia guruġana evinirito.

Mose

²³Mose tamana e sinana Barau ġenai tu ma ġeri veġabidadama. Moġa lorinai Mose emaġurito ġaronai ġeġitaiato mero keina namona korikori, benamo kini ġena guruġa garina tu asi ġeveito. Senaġi tamana e sinana na ġeġabiato, benamo numa nuġanai ġue toitoi ġetore-gumuato.

²⁴Mose ma ġena veġabidadama lorinai, ebaregoto nai tu asi eurato beġene kira, ġia tu Pharao natuna ġuiatona natuna merona. ²⁵Ġia tauġena eurato, Barau ġena tarimarima ġesi beġene vaġa-midigumidigu sebonaia. Ma asi eurato, vei-rakava nuġanai asi beġe tanu-maukani verereri ai bene tanu-namo. ²⁶Ġia na etuġamaġiato tu, Keriso uranai beġe vaġa-maiakaiani voina tu barego lelevaġi, Aigupito ai farefare voiri bevanaġirini. Korana ġia tu eboġeguine-iaġoto, ġoirai voina eġita-iaġoato.

²⁷Mose ma ġena veġabidadama lorinai, Aigupito na eraka-veġitato, Aigupito verena bebaruni garina asi egarito. Ġia tu ekokoreto, korana tu asi taġitaiani Barauna ġia na tu matana na noġa moġo eġitaiato. ²⁸Ma ġena veġabidadama lorinai, Rubu Veaġa verekona ekorana-iaġiato ema Isaraela tarimari ekirarito, rara ġeri ġatama-boka koberi murikari ai beġene dau. Benamo mase aneruna na naturi, ġemaġuri-guineto merori, asi bene vaġiri.

Isaraela tarimari na Barau ġeġabidadama-viniato

²⁹Isaraela tarimari na Barau ġeġabidadama-viniato lorinai, Davara Kakakakana nuġana na tanobara kaukauna na noġa moġo ġeraka-

vanaḡito. Ma Aigupito tarimari maki ḡevanaḡi ḡetato nai tu, davara na eḡutu-ḡaurito.

³⁰Isaraela tarimari ma ḡeri veḡabidadama lorinai, Jeriko vanuḡa maḡuna ḡaro vaḡa-imaima ruarua (7) ḡeraka-ḡeḡeraḡiato murinai eketoto.

³¹Mata-boraḡa ḡuiatona Rahaba Barau ḡenai eveḡabidadamato lorinai, Isaraela ḡeri maramara tarimari eḡabi-raḡerito, benamo Barau ḡeseḡafore-viniato-ḡoi tarimari ḡesi asi ḡevaḡi-sebonaiato.

³²Ma kara ma bakiraḡiani? Asi ḡegu taimi Gideon, Barak, Samson, Iefeta, Davida, Samuela ema peroveta tarimari variri bakiraḡirini. ³³Ḡia tu ma ḡeri veḡabidadama lorinai, tanobara basileiari ḡevetari-vinirito nai, ḡekokoreto-ḡoi. Veiḡa iobukaiobukari ḡeveito-ḡoi, ema kiraḡitore dagarari ḡeḡabirito laion bokari ḡekou-ḡaurito. ³⁴Karava seḡuka rakava ema-moreni ḡevei-buserito, ema vetari baḡari matari na ḡeraga-maḡurito. Ḡeri moiramoira nuḡari ai ḡekokoreto; vetari ai tu guruḡari maki seḡuka rakava, ema ḡevetari-vinirito-ḡoi doḡorori ḡevaḡa-ketorito-ḡoi. ³⁵Ḡemaseto-ḡoi tarimari ma ḡevaḡa-maḡuri ḡenoḡoirito-ḡoi, benamo sinari na ma ḡeḡabi-ḡenoḡoirito-ḡoi. Ma tari tu dibura numai tauḡaniri ḡekwari-rakava kwaikwairito-ḡoi ma dori ḡemaseto-ḡoi, senaḡi asi ḡeurato-ḡoi Barau beḡene kira-ḡuniḡaua, benamo dibura numana na beḡene ruḡa-vaḡiri. Korana ḡeri ura tu vaḡa-variḡisi ḡenoḡoi namona beḡene ḡabia.

³⁶Ma tari tu ḡevaseva-vaseva iaḡirito-ḡoi, ḡekwaririto-ḡoi, ma tari tu seini na ḡebarurito-ḡoi, benamo dibura numanai ḡetorerito-ḡoi. ³⁷Fore na ḡetakirito-ḡoi; ma tari tu ḡesoa-ḡuturito-ḡoi; ma tari tu vetari baḡari na ḡevaḡirito-ḡoi. Mamoe kefiru e nanigosi kefiru ḡevei-rakaoto-ḡoi, asi ḡeri-ḡari, ḡevaḡa-midigu midigurito-ḡoi, ema tarimarima na veiḡa asi namori ḡeri ai ḡevei-vinirito-ḡoi. ³⁸Tanobara ḡia ḡeri ai tu asi namo moḡo. Tanobara fakari na e ḡoro tuḡuri na, tano kouḡari na, ema guri na ḡetanu-rakaoto-ḡoi.

³⁹Maiḡeri tarimarima mabarari ḡeri veḡabidadama loriri ai, Barau na evaḡa-maḡuririto. Senaḡina ta na Barau na ekiraḡi-toreato dagarana ta tu asi eḡabiato. ⁴⁰Korana Barau na dabara namona ta ḡita ḡera eboioḡaiato. Ḡia ḡena ura ḡia maki ḡita ḡesi vaḡa-sebo vau bene vaḡa-namo vedaureara.

12 ¹Mo veḡabidadama tarimari, ḡita ḡeḡita-taḡorani tarimari, tu ḡutuma lelevaḡi, magube na noḡa moḡo beḡe ḡeḡeraḡira. Moḡa lorinai ḡita ḡekoukou-ḡaurani dagarari, ema vei-rakava ḡita ḡebarubarutarirani dagarari mabarari sifitoḡari. Benamo ma kokorera ḡesi ḡoirarai Barau na etoreato raga-iruirunai siraga. ²Matara Iesu ḡenai sitore-kauri. Korana Iesu na ḡita ḡera veḡabidadama esinaiato, ema bevaḡa-ḡuḡuruani. Ḡia na ḡoiranai mo iaku e verere etuḡamaḡiato nai, satauro maiakana asi etuḡamaḡiato. Benamo Barau ḡena terona aroribanai etanu-tarito.

³Iesu situḡamaḡia. Ḡia tu vei-rakava tarimari na asi ḡeḡabi-raḡeato, ḡeseḡafore-viniato, senaḡina ekokoreto. Moḡa lorinai asi boḡono tuḡamaḡi-moira, e asi boḡono ruḡa-ḡuirāḡi. ⁴Ḡomi tu rakava ḡesi ḡovevaḡi-tanuni. Senaḡina ḡomi mani vevaḡi nuḡanai tu, ta raramu roḡosi roḡo bere riḡo. ⁵Emā ḡomi tu Barau na ekeamito ḡia natuna, senaḡi mai velaunaḡi guruḡana tu ḡotuḡarekwaiato, ekirato,

“Natugu, Vereḡauka na vevaḡa-riba veiḡari gwaḡiḡiri evinimuni nai, asi bono ḡabi-meraḡari, emā bekira-feimuni nai, nuḡamu asi bono vaḡa-moiraia.

⁶Korana Vereḡauka na eura-vinirini tarimari tu vevaḡa-riba gwaḡiḡiri evinirini,

emā ḡia natunai evaḡa-iaḡorini tarimari mabarari tu ekwaririni.”

⁷Moḡa lorinai matakani veiḡari ḡemi ai beḡe ḡorani nai tu boḡono kokore. Korana ḡomi tu Barau natuna naima moḡesina eveimini. Ma siḡitaia, kamara mero keina tu tamana na asi evaḡa-matakaniani? ⁸Tama mabarari na naturi ḡevaḡa-matakanirini. Ma bema ḡomi Barau na asi evaḡa-matakanimini, moḡa anina ḡomi tu dia Barau natuna korikori, ḡomi tu gara meromi. ⁹Vaḡa-ilailana tauḡani rekenai ḡita tamara korikoriri na ḡevaḡa-matakanirani, benamo moḡeri korari ai tamara tagubakaurini. Moḡesina kavana namona tu ḡita tata iaukara Tamari Barau maki tana gubakaua, benamo bitana maḡuri. ¹⁰Ḡita tamara na tu ḡaro kotunai moḡo ḡevaḡa-matakanirani. Mo tu ḡia tauḡeri na ḡetuḡamaḡiani namo ḡetoni ḡarori ai moḡo. Senaḡi Barau na evaḡa-matakanirani tu ḡita ḡera namo ḡana, emā ḡia ḡesi bitana veaḡa-vegogo ḡana. ¹¹Maitoma matakani veiḡari ḡeiaḡomani tu ma midigumidiguri, asi iakuri. Senaḡina murinai vau mo matakani veiḡari ḡerina beribani tarimana tu vei-iobukaiobuka emā maino tarimanai beiaḡoni.

Nuḡara bitana vaḡa-kokoreri emā bitana ruḡa-gigitari

¹²Moḡa lorinai ḡimami beḡe ḡeroḡero-riḡo, ḡoḡabi-vaisiri, emā tuimi beḡe moira ḡeḡoḡo-ḡoḡorini, ḡovaḡa-kokoreri. ¹³Benamo kwakumi na ḡoraka-iaḡirini fanari ḡovei-roroḡotori, be kwaku rakava tarimana kwakuna asi bene rakava-lelevaḡi, senaḡi bene namo.

¹⁴Boḡono kokore-korikori, tarimarima mabarari ḡesi maino ai boḡono tanu uranai. Be ḡemi maḡuri beḡene veaḡa e asi vetoukaunai beḡene iaḡo bene. Korana tu ma vetoukauna e asi veaḡa tarimana na Vereḡauka tu asi beḡitaiani. ¹⁵Boḡono venari, be tarima ta Barau ḡena varevare-bara ḡenana asi bene raka-veḡita, ma nuḡa-ḡirima ḡokana nuḡanai asi bene tubu-raḡe. Korana nuḡa-ḡirima ḡokana betubuni, ḡokana mamakina na ḡomi fakami ai rakava bevaḡa-ḡoraiani, benamo tarimarima vovoka bevaḡa-rakavarini Barau ḡoiranai. ¹⁶Boḡono ḡitaia, ta ḡomi fakami ai

mata-boraġa veġari asi bene veiri, ema Esau na Barau asi ekorana-iaġiato kavana asi bene vei. Esau na tu ġena maġuri guine seġukana ġaniġani diġu sebna moġo uranai evare-fitoġaiato. ¹⁷Moġa murinai ġomi ma ribami, mo maġuri guine vevaġa-namona tamana ġenana neġabia etato tu tamana na asi eġabi-raġeato. Moġoni, tamana ma taġina ġesi enoġiato, senaġi tamana asi ma etuġamaġi-ġenoġiato.

¹⁸Ġomi tu dia ġimami na boġo ġabi-karaiani ġorona ġana boġo iaġoma, Isaraela tarimari kavana. Ġia tu Sinai Ġorona sevina korikorinai ġeruġato, benamo karava emoreto ġeġitaiato, ema mukuna dubara kiukiuna e iavara barego lelevaġina; ¹⁹ema kibi guruna asikeikeina eraġeto e garo baregona eguruġato ġeseġaġirito. Isaraela tarimari na mo garo ġeseġaġiato nai tu, Mose ġenoġiato mo garo na asi ma bene vaġa-guruġari. ²⁰Korana Barau na taravatu guruġari evinirito nai tu, ġegari-rakavato, Barau tu ekirato, “Bema tarima ta na o boromakau ta o nanigosi ta na mo ġoro bea vei-karaiani nai tu, fore na boġono takimasea.” ²¹Moġeri vetoġa ġefoforito gariri tu asikeikeiri, benamo Mose ekirato, “Au tu eġoġo-ġoġoguni, aġari-rakava rakavani.”

²²Senaġina ġomi tu Siona Ġorona ġana boġo iaġoma e guba Ierusalemna maġuri Barauna ġena vanuġa baregona ġana, ema aneru ġutuma gorogoro asi iavi-iaviri ġeri ai boġo iaġoma. ²³Ġomi tu vegogo baregona ġena e Barau natuna ġemaġuri-guineto ekalesiari ġeri ai boġo iaġoma. Ġia arari tu Barau na gubai etorerito. Ema ġomi tu tarimarima mabarari Kotai beġita-viriġirini Barauna ġenai e vei-iobukaiobuka tarimari iaukari, Barau na evaġa-namo vedaurearito iaukari, ġeri ai boġo iaġoma. ²⁴Ema Iesu ġenai boġo iaġoma. Iesu ginitaġo variġunai tu Barau e tarimarima fakari ai eruġani. Ema ġia rarana ġenai boġo iaġoma. Iesu rarana tu ġomi ġemi ai eketokauto. Ma Iesu rarana na ekiraġiani guruġana seġukana na Abela rarana ġena guruġa seġukana evanaġiani.

²⁵Boġono venari, Barau na evaġa-guruġamini nai, garona asi boġono kira-sirivaġi-vinia. Korana tanobarai Barau na ekira-toreġaurito tarimari ġekira-sirivaġito nai tu, asi ġeraga-maġurito. Ġeri kira-sirivaġi voina ġeġabiato. Ġita tu kamasi bita raga-maġurini? Barau toma tu gubai etanuni, benamo monana ġita ekira-toreġaurani. Bema ġia ġenana bita raka-veġitani nai tu, kamasi bita raga-maġurini. ²⁶Moġeri ġaro ai Barau garona na tanobara eruku-iagaiagaiato. Senaġina toma Barau tu eguruġa-toreto, ekirani, “Au na tanobara vaġa-sebna maia barukuani. Dia tanobara ġereġana moġo barukuani, senaġina guba maki barukuani.” ²⁷Mai guruġa “vaġa-sebna maia” anina tu, guinenai Barau na eveirito dagarari beġe iagaiagani nai tu bekoki-veġitarini. Korana tu asi beġe iagaiagani dagarari moġo beġene tanu ġana.

²⁸Ġita na taġabiani basileiana tu asi beġareva-ġarevani. Moġa lorinai Barau sitanikiu-vinia, ema Barau na eura-viniani maġurinai sitoma-

rakariḡo vinia ma vegubakaura e ma garira ḡesi. ²⁹Korana ḡita ḡera Barau tu karava ḡaraḡara.

Barau vaḡa-iakuna veiḡari

13 ¹Ḡomi fakami ai tarikaka veuravinina bene tanu-vanaḡi vanaḡi. ²Tarima boruri ḡabiraḡeri asi boḡono tuḡa-rekwaia, korana tarima tari maniḡesi ḡeveito-ḡoi nai tu, aneru ḡeḡabi-raḡerito. Senaḡi ḡia tu asi ḡeriba-maoroto mo tu aneru ḡeḡabi-raḡerini.

³Dibura numanai ḡetanuni tarimari boḡono tuḡamaḡiri. Boḡono tuḡamaḡi, ḡomi maki ḡia ḡesi dibura numanai ḡoro tanu-vegogo. Ema ḡevaḡa-midigu midigurini tarimari boḡono tuḡamaḡiri. Boḡono tuḡamaḡi ḡomi maki ḡere vaḡa-midigu midigumi.

⁴Tarimarima mabarari na veḡaraḡo beḡene gubakaua, ema veḡaraḡo tarimari ḡeri genagena gabuna bene namo-vedaurea. Korana ma ḡaraḡona, senaḡina ekima-rakaoni, o ma eveḡaraḡo-sirivaḡini tarimana, ema mata-boraḡa veiḡari ḡeveini tarimari mabarari tu Barau na ḡeri rakava voiri bevinirini.

⁵Moni asi boḡono uravini-lelevaḡiri. Kara dagara ḡemi ai maniḡeri boḡono ḡabi-raḡeri ma iakumi ḡesi. Boḡono kira, mai dagara ḡemai maiḡeri tu ḡemai ilaila. Korana Barau tu ekirato,

“Au na asiḡina ḡinavaḡi baraga-kwanemini,
ema ḡereḡami asiḡina ḡinavaḡi baiaḡuimini.”

⁶Moḡa lorinai nuḡara ma kokoreri ḡesi bitana kira,

“Vereḡauka na au bevaḡa-kavaguni,
be au asi bagarini.

Tarimarima na tu kara beḡe veiani au ḡegu ai?”

⁷Ḡotuḡamaḡi-ḡenoḡoi, ḡeguine-iaḡimito-ḡoi tarimari ḡotuḡamaḡiri. Ḡia na Barau ḡena guruḡa ḡemi ḡekiraḡito. Ḡia ḡeri maḡuri na kara ḡefoforito eiaḡoto mo ḡea maseto boḡono tuḡamaḡiri, ema ḡia ḡeri veḡabidadama boḡono tovtovori.

⁸Iesu Keriso tu ḡoraḡani, toma, ema vanaḡivanaḡi asi beirauni.

⁹Vevaḡa-riba irauirauri na dabara moḡonina na asi beḡene ḡori-veḡitami. Namona tu Barau ḡena varevare-bara na ḡita iaukara bene vaḡa-kokoreri. Ḡaniḡani taravaturi irauirauri na ḡita iaukara tu asi beḡe vaḡa-kokorerini. Moḡeri taravatu ḡekorana-iaḡirito-ḡoi tarimari tu namo ta asi ḡeḡoitaḡoato.

¹⁰Ḡita tu ma ḡera fata veaḡana. Senaḡina Barau toma-rakariḡona ḡana farai rubuna nuḡanai ginitaḡo ḡauveiri ḡeveito-ḡoi tarimari tu mai fatai asi beḡe ḡaniḡanini. ¹¹Rubu Vevaḡa verena baregona na boromakau, nanigosi, mamoe evaḡirito-ḡoi nai, tauḡaniri tu eḡabi-rosirito-ḡoi Isaraela tarimari ḡeri totoḡa gabuna na, benamo murikai vau ea gaburito-ḡoi. Rarari moḡo Vevaḡa Lelevaḡi Gabunai eḡabi-toḡarito-ḡoi, rakava

g̃abiveg̃itari varevarena bene vei-iaḡiri g̃ana. ¹²Moḡesina naima Iesu maki rarana na tarimarima bene vaḡa-veaḡari g̃ana tu, Ieruselema vanuḡa barana maḡuna murikanai emidigu-midiguto. ¹³Moḡa lorinai ḡita maki Iesu ḡenai totoḡa murikana g̃ana siraka-rosi. Be, ḡia na eḡabiato maiakana ḡita na maki bitana ḡabia. ¹⁴Korana mainai ḡita tu asi ḡera tanu-vanaḡivanaḡi vanuḡana. A ḡita tu vanuḡa vau ma beiaḡomani dagarana tavetauani. ¹⁵Moḡa lorinai vanaḡivanaḡi Barau vonevone-raḡena varevareri Iesu ḡenana bitana vini-raḡea Barau ḡenai. Barau arana vonevone-raḡena tu ḡita murura ḡwaḡwana. ¹⁶Veiḡa namori veiveiri asi boḡono tuḡa-rekwari, ema ḡemi ai guruḡa moḡoniri maniḡeri karomi ḡeri maki boḡono kiraḡi. Korana tu maniḡesina veiḡari tu ginitaḡo dagarari namori Barau na eiaku-iaḡirini.

¹⁷Ḡeguine-iaḡimini tarimari garori boḡono seḡaḡiri, ema ḡeri veḡorikau maorona gaburenai boḡono tanu. Korana ḡia na tu ḡomi ḡemi maḡuri ḡeḡita-ḡaurini, ema ḡomi ḡemi maḡuri aiḡesina Barau ḡenai beḡea kiraḡirini. Garori boḡono seḡaḡiri, be ma iakuri ḡesi ḡeri ḡauvei beḡene veia, a dia nuḡari ma metori ḡesi. Korana bema nuḡari ma metori ḡesi ḡomi beḡe narimini nai tu, ḡomi na namo ta asi boḡo doḡariani.

¹⁸Ḡema boḡono ḡuriḡuri. Ḡai ribama ḡai nuḡama tu veiareva Barau ḡoiranai, ema ḡema ura barana tu vegubakau ai moḡo baḡana tanu. ¹⁹Ḡegu noḡinoḡi barego lelevaḡina ḡomi ḡemi ai tu boḡono ḡauḡau, be ḡemi ai ma bana ḡenoḡoi-ḡariḡari.

²⁰Maino Barauna na ḡera Vereḡauka Iesu tu betanu-vanaḡi vanaḡini ginitaḡo rarana ḡenana ma evaḡa-maḡuri ḡenoḡoiato. Iesu tu mamoe nari tarimana baregona. ²¹Mai maino Barauna na dagara namori mabarari bene vinimi, ḡena ura boḡono veia ḡana. Ema kara ḡia na eiaku-iaḡirini dagarari Iesu Keriso ḡenana ḡita nuḡarai bene ḡauvei-iaḡiri. Mareva baregona tu ḡia ḡena bene iaḡo mo vanaḡivanaḡi. Amen.

²²Tarikakagu mabarami, anoḡimini, ḡegu vevaḡa-naḡi guruḡari maiḡeri boḡono ḡabi-raḡeri ma nuḡami namori ḡesi; korana fefa tu kubina moḡo batorea. ²³Au aurani navaḡa-ribami, ḡita tarikakara Timoteo tu dibura numana na beḡe tuḡu-vaḡia. Bema ḡia bema raḡasi-ḡarimoḡini tu, tauma ruarua baḡa iaḡosini ḡitaḡitami.

²⁴Ḡema vevaḡa-namo ḡemi veḡorikau tarimari ema Barau ḡena tarimarima veaḡari mabarari boḡono viniri. Itali tarimari na maki ḡemi vevaḡa-namo beḡe tuḡu.

²⁵Barau ḡena namo e varevare-bara mabarami ḡemi ai bene tanu.